

CONCERT en Puntreïs



Chor mishedau Puntreïs presenta
sias canzuns
ils 13.-08-23, allas 15⁰⁰

«Vi Mumpé eis ei schi bi...»

Duront bunamein in'ura ha il Chor Puntreis delectau la dumengia suenter miezdi pli che 50 auditoras ed auditurs.

Il cant ei omnipresents ella casa da tgira a Mustér e quei ei stau da sentir duront igl emprem concert insumma dallas cussadentas e dils cussadents.



Il Chor Puntreis ha concertau la dumengia suenter miezdi.

FOTOS HANS HUONDER

HANS HUONDER/FMR

In chor cun cantaduras e cantadurs ella vegliadetgna da 90 e 100 onns ei bein enzatgei singular. Singular eis ei era che quel se presenta publicamein. Pusseivel ei quei grazia alla voluntad da 19 cantaduras e treis cantadurs che s'entaupan regularmein per cantar e sedivertir. Mo era pervia da persunas ch'eiin prontas da far musica cullas senioras ed ils seniors. Tiel Chor Puntreis dalla casa da tgira a Mustér ei quei *Regina Caminada* ch'ei engaschada ell'activaziun e che meina il chor, la pianista *Erika Steinacher* e *Benjamin Schuoler* ch'exercitescha regularmein cul chor.

Avon publicum

Ils fretgs dils exerczis regulars han las senioras ed ils seniors saviu raccoltar la

dumengia suenter miezdi. Lu ha il Chor Puntreis concertau ella biblioteca da lur dadasa, la localitad avon la caplutta. Cun rodund in tozzel canzuns, surtut romontschas, han las senioras ed ils seniors delectau pli che 50 auditoras ed auditurs, giuvens e vegls, surtut parentella dallas cantaduras e dils cantadurs. Il repertori ha cunteniu pliras canzuns bein enconuschantas, tocs che las senioras ed ils seniors cantavan probablamein gia pli baul. Aschia era la canzun da Mumpé: «Vi Mumpé – leu eis ei aschi bi – leu less jeu esser mintga di». Ina ga ni l'autra ei in toc vegnius cumpletaus d'in tuschem, quei che ha denton buca fatg surstar muort la steppadad. E malgrad che la trambletga d'ina ni l'autra ha engreviau empauet la lectura dil text, ein ils tuns vegni tuccai remarcablamein

«Nus cantavan gia stedi a casa pli baul e secapescha era da cumpignia.»

Julia Fry-Desax, cantadura

bein. Per in chor da senioras e seniors en quella vegliadetgna ei quei ina excellenta prestaziun e per haver dau igl emprem concert public en quella formaziun aschia ni aschia. La purschida ha plaschiu aschi bein agl auditori, ch'il supplement per la fin dil concert ha secapescha buca astgau muncar.

Star da cumpignia

La senora dil chor da senioras e seniors – *Julia Fry-Desax* da Mustér che cumplenescha prest igl anniversari da 101 onns – ei stada prompta da dar plaid e fatg suenter il concert. «Nus cantavan gia stedi a casa pli baul e secapescha era da cumpignia. Igl ei bi che nus savein era s'entupar cheu e far zatgei communablamein», ha ella detg silla damonda dalla FMR, tgei che la participaziun al chor



Julia Fry-Desax ha prest 101 onns. Sper treis cantadurs eis ella ina da rodund 20 cantaduras dil Chor Puntreis.

munti per ella persunalmein. *Stefania Cavegn* da Sedrun ch'ei dapi otg meins en Puntreis di cuortamein: «Pli baul era la vusch megliera.» Fastginau d'ir a beiber caffè suenter il concert ha *Albert Pally*, oriunds da Platta e per quei eis el setenius cuort: «Quei cant ei pil passatemp, pil plascher e per separticipar.» Semegliontamein ei siu convischin da *Mutschnengia*, *Pauli Pally*, s'exprimius: «Quei ei bi, mo nus essan memia paucs umens. Lezs contan probabel buca bugen canzuns tudestgas.» Il Chor Puntreis s'entaupa a ses exerczis mintgamai ils treis emprems venderdis dil meins avon gentar, leutier vegnan in entochen dus ulteriurs exerczis per meins. En quels exerczis vegn cantau surtut canzuns romontschas, per part era veglias, mo era tocs per talian, franzos e tudestg.